



東國通鑑
六之七
共三十一

リ 6
4060
4



門 伊 6
號 4060
卷 31-4



申壬

東國通鑑卷之六

三國紀

新羅

高句麗

百濟

隋大業八年新羅真平王三十四年高句麗嬰陽王二十三年百濟武王十三年春

正月隋下詔伐高句麗詔曰小醜昏迷不恭
崇聚勃碣之間荐食遼瀋之境雖復漢魏誅
戮巢穴斬傾亂離多阻種落還集惡稔既盈
亡徵已兆移告之嚴未嘗面受朝覲之禮莫
肯躬親誘納亡叛充斥邊陲關拆以之不靜
生人為之廢業昔在薄伐已漏天網曾未懷



恩翻為長惡乃無契丹之黨虔劉海戍習棘
鞞之服侵軼遼西又青丘之表咸修職貢碧
海之濱同稟正朔遂復效攘琛貢過絕徃來
輜車奉使爰暨海東旌節所次途經藩境而
擁塞道路拒絕王人無事君之心豈為臣之
禮此而可忍孰不可容且法令苛酷賦歛煩
重強臣豪族咸執國鈞賄貨如市冤枉莫伸
重以仍歲災凶比屋饑饉兵戈不息徭役無
期力竭轉輸身填丘壑百姓愁苦爰誰適從
於是親搃六師用伸九伐拯厥阡危協從天

新羅真平王

高句麗嬰陽王

百濟武王

意珍茲逋穢克嗣先謨今宜受律啓行分麾
屈路左十二軍出鏤方長岑溟海蓋馬建安
南蘇遼東玄菟扶餘朝鮮沃沮樂浪等道右
十二軍出黏蟬舍資渾彌臨屯侯城提奚踏
頓肅慎碣石東曉帶方襄平等道絡繹引途
總集平壤凡一百十三萬三千八百人號二
百萬其餽輸者倍之宜社於南桑乾水上類
上帝於臨朔宮南祭馬祖於薊城北帝親授
節度每軍上將亞將各一人騎兵四十隊隊
百人十隊為團步卒八十隊分為四團團各

有偏將一人其鎧冑纓拂旗幡每團異色日遣一軍相去四十里連營漸進終四十日發乃盡首尾相繼鼓角相聞旌旗亘九百六十里御營內合十二衛三臺五省九寺分隸內外前後左右六軍次後發又亘八十里二月帝御師進至遼水衆軍總會臨水為大陣麗兵阻水拒守隋兵不得濟帝命工部尚書宇文愷造浮橋三道於遼水西岸既成引橋趣東岸短不及岸丈餘麗兵大至隋兵驍勇者爭赴水接戰麗兵乘高擊之隋兵不得登岸

新羅真平王 高句麗嬰陽王 百濟武王

死者甚衆麥鐵杖躍登岸與錢士雄孟金义等皆戰死乃斂兵引橋復就西岸更命小府監何稠接橋二日而成諸軍相次繼進大戰于東岸麗兵大敗死者萬計諸軍乘勝進圍遼東城車駕到遼下詔赦天下命刑部尚書衛文昇等撫遼左之民給復十年建置郡縣以相統攝初諸將之東下也帝戒之曰凡軍事進止皆須奏聞待報無得專擅遼東數出戰不利乃嬰城固守帝命諸軍攻之又勅諸將高句麗若降宜撫納不得縱兵遼東城將

陷城中人輒言請降諸將奉旨不敢赴先期
令馳奏比報至城中守禦亦備隨出拒戰如
此再三帝終不悟既而城久不下○夏六月
高勾麗遣乙支文德禦隋師隋師大敗而還
先是帝幸遼東城南觀其城池形勢因召諸
將詰責之曰公等自以官高又恃家世欲以
暗懦待我耶在都之日公等皆不願我來恐
見病敗耳今我來此正欲觀公等所為斬公
輩耳公今畏死莫肯盡力謂我不能殺公耶
諸將皆戰懼失色帝因留止城西數里御六

新羅真平王

高勾麗嬰陽王

百濟武王

合城高勾麗諸城堅守不下左翎衛大將軍
來護兒帥江淮水軍舳艫數百里浮海先進
入自浪水去平壤六十里與麗軍相遇進擊
大破之護兒欲乘勝趣其城副摠管周法尚
止之請俟諸軍至俱進護兒不聽簡精甲數
萬直造城下高勾麗伏兵於羅郭內空寺中
出兵與護兒戰而偽敗護兒逐之入城縱兵
俘掠無復部伍伏兵發護兒大敗僅而獲免
士卒還者不過數千人高勾麗軍追至船所
法尚整陣待之麗軍乃退護兒引兵還屯海

浦不敢復留應接諸軍左翊衛大將軍宇文
述出扶餘道右翊衛大將軍于仲文出樂浪
道左驍衛大將軍荆元恒出遼東道右翊衛
大將軍薛世雄出沃沮道右屯衛將軍辛世
雄出玄菟道右禦衛將軍張瑾出襄平道右
武侯將軍趙孝才出碣石道涿郡太守檢校
左武衛將軍崔弘昇出遂城道檢校右禦衛
虎賁郎將衛文昇出增地道皆會於鴨綠水
西述等兵自瀘河懷遠二鎮人馬皆給百日
糧又給排甲槍稍并衣資戎具火幕人別三

高句麗嬰陽王 百濟武王

石已上重莫能勝致下令遺棄粟米者斬士
卒皆於幕下掘坑埋之纔行及中路糧已將
盡高句麗王遣大臣乙支文德詣其營詐降
實欲觀虛實仲文先奉密旨若遇王及文德
來者必擒之仲文將執之尚書右丞劉士龍
為慰撫使固止之仲文遂聽文德還既而悔
之遣人給文德曰更欲有言可復來文德不
顧濟鴨綠水而歸仲文與述等既失文德內
不自安述以糧盡欲還仲文議以精銳追文
德可以有功述固止之仲文怒曰將軍將十

萬之衆不能破小敵何賴以見帝與諸將渡
水追文德文德見述軍士有饑色故欲疲之
每戰輒走述等一日之中七戰皆捷既恃驟
勝又逼羣議於是遂進東濟薩水去平壤城
三十里因山為營文德遺仲文詩曰神策究
天文妙算窮地理戰勝功既高知足願云止
仲文答書諭之文德復遣使詐降請於述曰
善旋師者當奉王朝行在所述見士卒疲弊
不可復戰又平壤城險固度難猝拔遂因其
詐而還述等為方陣而行文德出軍四面鈔

新羅真平王 高句麗嬰陽王 百濟武王

擊且戰且行秋七月至薩水隋軍半濟麗軍
自後擊其後軍右屯衛將軍辛世雄戰死於
是諸軍俱潰不可禁止將士奔還一日一夜
至鴨綠水行四百五十里將軍王仁恭為殿
擊麗軍却之護兒聞述等敗亦引還唯文果
一軍獨全初九軍到遼凡三十萬五千及還
至遼東城唯二千七百人資儲器械鉅萬計
失亡蕩盡帝大怒鎖繫述等癸卯引還初百
濟王遣使請討高句麗帝使之覘高句麗動
靜百濟王潛與麗通隋軍將出使其臣國知

年入唐請師期帝大悅厚加賞賜遣尚書起
部郎席律詣百濟告以期會及隋軍渡遼百
濟亦嚴兵境上聲言助隋實持兩端隋之是
役也唯於遼水西拔高勾麗武厲羅置遼東
郡及通定鎮而已乙支文德資質沈鷲有智
數兼解屬文

金富軾曰煬帝遼東之役出師之盛前古
未之有也高勾麗一偏方小國而能拒之
不唯自保而已滅其軍幾盡者文德一人
之力也傳曰不有君子其何能國乎信哉

臣守按自古兵家勝敗不在於兵之多少
而在於將之賢否苻秦以百萬之衆伐晉
如以千鈞壓鳥卵之上目中已無江左而
自以謂投鞭可渡矣謝玄以八萬兵渡江
一戰秦兵不敢枝梧狼狽奔北中原數千
里之地暴骨蔽野苻堅禡魄單騎獨免比
至洛陽軍纔十萬玄以區區江左之兵禦
強胡傑虜百萬魏駝折箠答之由晉之君
臣將得其才臨機應變得制勝之策耳隋
氏既一天下非苻秦竊據之比其兵則倍

蕤於苻秦其富則倍蕤於苻秦煬帝動天下之兵以二百萬衆征一小國親搃六師命二十四軍分左右進兵來護兒帥水軍檣帆蓋海水陸并進前後掎角古今出師之盛未有如今日者也煬帝之心自以為戰無不勝攻無不取不誅滅高氏丘墟平壤則兵不已也及軍到遼東士馬旌旗威靈氣焰震蕩海宇為高勾麗計者疑若束手乞降之不暇矣乙支文德雖在捨棄之中從容籌畫且戰且降以奇計誘于仲

新羅真平王 高句麗嬰陽王 高麗武王

文引師而還伺其隙出死力盡銳攻之如摧枯拉朽以天下二百萬之衆盡為薩水鴨江之鬼生還者纔二千七百人煬帝大敗而還為天下笑再舉憤兵兵憤無功適足以名玄感之叛耳蓋高麗之地偏在一隅無江左西陵鉅鹿蕪城屍水之勝無謝安王導素養之兵又無朱序反間之言以一平壤孤軍弱卒抗天下之大兵卒獲全勝方之謝玄文德優焉非文武才高勇智兼全者能然乎自是以後雖唐宗之神武

不得志於安市深自悔惜以遼金蒙古之
兇鷲亦不得大肆毒螫金山金始哈丹紅
寇之兵皆殲於我國天下後世以吾東方
為強國而不敢輕犯者豈非文德控強隋
立威靈之餘烈乎

隋大業九年新羅真平王三十五年高句麗
王二十四年百濟武王十四年

正月帝復欲伐高句麗詔徵天下兵集涿郡
募民為疏果修遼東古城以貯軍糧二月帝
謂侍臣曰高句麗小虜侮慢上國今拔海移
山猶望克果况此虜乎乃復議伐左光祿大

高句麗嬰陽王百濟武王

夫郭榮諫曰戎狄失禮臣下之事千鈞之弩
不為懸鼠殺機奈何親辱萬乘以敵小寇乎
帝不聽○夏四月隋兵攻高句麗遼東城不
克而還先是帝渡遼遣宇文述揚義臣趣平
壤王仁恭出扶餘道進軍至新城麗兵數萬
拒戰仁恭帥勁騎一千擊破之麗軍嬰城固
守帝命諸將攻遼東飛樓撞雲梯地道四面
俱進晝夜不息高句麗應變拒之二十餘日
不拔主客死者甚衆衝梯竿長十五丈驍果
沈光升其端臨城與麗軍戰短兵接殺十數

人麗軍競擊之而墜未及地適遇竿有垂絙
光接而復上帝壯之即拜朝散大夫城久不
下帝遣造布囊百餘萬口滿貯土欲積為魚
梁大道闊三十步高與城齊使戰士登而攻
之又作八輪樓車高出於城夾魚梁道欲俯
射城內指期將攻城內危蹙會揚玄感叛書
至帝大懼密召諸將使引軍運軍資器械攻
具積如丘山營壘帳幕不動衆心恟懼無復
部分麗軍覺之然不敢出但於城內鼓噪至
來日午時方漸出外猶疑隋軍詐之經二日

新羅真平王 高句麗 嬰陽王 百濟武王

乃出數千兵追躡畏隋軍之衆不敢逼常相
去八九十里將至遼水知御營畢渡乃敢逼
後軍時後軍猶數萬人麗軍隨而鈔擊殺掠
數千人○秋七月隋使王世儀至新羅皇龍
寺設百高座邀僧圓光等說經

隋大業十年新羅真平王三十六年高句麗嬰陽王二十五年百濟武王十五年春

二月新羅廢沙伐州置一善州以一古倉日
夫為軍主○辛未帝召百寮議復伐高句麗
數日無敢言者辛卯詔曰黃帝五十二戰成
湯二十七征方乃德施諸侯令行天下盧芳

戊

小盜漢祖尚且親戎隗囂餘燼光武猶自登隴豈不欲除暴止戈勞而後逸者哉朕纂承寶業君臨天下日月所照風雨所沾孰非我臣叢爾高麗僻居荒表鷓鴣張狼噬侮慢不恭鈔竊我邊陲侵軼我城鎮是以去歲出車問罪遼碣殪長蛇於玄菟戮封豕於平壤扶餘衆軍風馳電逝追奔逐北徑踰涇水滄海舟楫衝賊腹心焚其城郭汚其宮室高元伏鑽泥首送款軍門尋請入朝歸罪司寇朕許其改過乃詔班師而長惡未悛宴安鴆毒此而

乃云數千兵追躡畏隋軍之衆不敢逼常相

去八九十里將至遼水知御營畢渡乃敢逼後軍時後軍猶數萬人麗軍隨而鈔擊殺掠數千人○秋七月隋使王世儼至新羅皇龍寺設百高座邀僧圓光等說經

大業十年新羅貞平王三十五年高句麗武王十五年春

二月新羅廢沙伐州置一善州以一吉倉日夫為軍主○辛未帝召百寮議復伐高句麗數日無敢言者辛卯詔曰黃帝五十二戰成湯二十七征方乃德施諸侯令行天下盧芳

小盜漢祖尚且親戎隗囂餘燼光武猶自登
隴豈不欲除暴止戈勞而後逸者哉朕纂承
寶業君臨天下日月所照風雨所沾孰非我
臣叢爾高麗僻居荒表鴟張狼噬侮慢不恭
鈔竊我邊陲侵軼我城鎮是以去歲出車問
罪遠碣殪長蛇於玄菟戮封豕於平壤共餘
衆軍風馳電逝追奔逐北徑踰涇水滄海舟
楫衝賊腹心焚其城郭汚其宮室高元伏鑽
泥首送款軍門尋請入朝歸罪司寇朕許其
改過乃詔班師而長惡未悛宴安鳩毒此而

可忍孰不可容便可分命六師百道俱進朕
當親執武節臨御諸軍秣馬九都觀兵遼水
順天誅於海外救窮民於倒懸征伐以正之
明德以誅之止除元惡餘無所問若有識存
二之分悟安危之機離然北首聿求多福必
期同惡相濟抗拒王師若火燎原刑茲無赦
有司便宜宣布咸使聞知三月壬子帝幸涿
郡癸亥次臨渝宮親御戎服禡祭黃帝斬叛
軍者以纍鼓夏四月車駕次北平秋七月癸
丑次懷遠鎮時天下已亂所徵兵多失期不

乙亥

丙子

戊寅

至高句麗亦因弊來護兒至卑奢城麗兵逆

戰護兒克之持趣平壤麗王懼遣使乞降因

送斛斯政帝大悅遣使持節名護兒還八月

己巳帝自懷遠鎮班師徵王入朝王竟不從

隋大業十一年新羅真平王三十七年高句麗嬰陽王二十六年百濟武王十六年春

二月新羅大誦三日

隋大業十二年新羅真平王三十八年高句麗嬰陽王二十七年百濟武王十七年冬

十月百濟命達率奇領兵八千攻新羅毋

山城○十一月百濟王都地震

隋恭帝義寧二年唐高祖武德元年新羅真平王四十年高句麗嬰陽王二十九年榮留

王元年百濟新羅北漢山州都督邊品金山

懂主奚論謀復振岑城奚論死之奚論讚德

之子以父功為大奈麻仕至懂主至是與邊

品謀殺兵襲振岑城取之百濟舉兵而來奚

論等逆之兵既相交奚論謂諸將曰昔吾父

隕身於此我今亦與百濟人戰於此是我死

日也遂以短兵赴敵斬數人而死王卹其家

甚厚時人無不哀悼為作長歌吊之○秋九

月高句麗王元薨號曰嬰陽王異母弟建武

立

己卯

唐武德二年新羅真平王四十年春二

辛巳

唐武德四年新羅真平王四十二年秋七

月高勾麗遣使朝唐

唐武德四年新羅真平王四十二年秋七

月新羅遣使朝唐高祖親勞問之遣通直散

騎常侍吏文素來聘賜以璽書及畫屏風錦

綵三百段

○冬十月百濟遣使如唐獻果下

壬午

唐武德五年新羅真平王四十四年春二

月新羅以伊食龍樹為內省私臣初王即位

大宮梁宮沙梁宮各置私臣至是置內省私

臣一人兼掌三宮位自衿荷至太角干選

人授之○高勾麗遣使朝唐帝感隋末戰士

多陷於高勾麗詔曰朕恭膺寶命君臨率土

祗順三靈懷柔萬國普天之下情均撫字日

月所炤咸使乂安王統攝遼左世居落服思

稟正朔遠修職貢故遣使者跋涉山川申布

誠懇朕甚嘉之方今六合寧晏四海清平玉

帛既通道路無壅方申輯睦永敦聘好各保

強場豈非盛美但隋氏季年連兵構難攻戰

之所各失其氓遂使骨肉乖離室家析多

申甲

歷年歲怨曠不申今二國通和義無阻異在此所有高句麗人等已令追括尋即遣送彼處所有此國人者王可放還務盡綏育之方共弘仁慈之道於是高句麗悉搜隋人未還者萬餘送之帝大喜

唐武德七年新羅真平王四十六年高春正月高句麗榮留王七年百濟武王二十五年

月新羅置侍衛府大監六貳位自奈麻至阿
倉為之又置賞賜署大匠一貳大道署大正
一貳○百濟遣大臣朝唐帝嘉其誠款遣使
就冊為帶方郡公百濟王○二月高句麗三

新羅真平王 高句麗榮留王 百濟武王

遣使如唐請頒曆帝遣刑部尚書沈叔安策
王為上柱國遼東郡公高句麗王又命道士
以天尊像及道法來為講老子書王率國人
聽之○三月唐遣使冊新羅王為柱國樂浪
郡公新羅王○冬十月百濟陷新羅速舍等
諸城守將訥催死之先是百濟大舉兵分攻
速舍櫻岑歧岑峰岑旗懸穴柵等城王命上
州下州貴幢法幢誓幢五軍往救之五軍既
到見百濟兵強逗留不進諸將議曰王以五
軍委諸吾輩國之存亡在此一舉兵法曰見

可而進知難而退今強敵在前輕進萬一失
利悔不可追遂不進只築奴环等六城而歸
於是百濟急攻速舍歧岑穴柵三城或滅或
降訥催獨以烽岑櫻岑旗懸三城固守聞五
軍不救而還慷慨謂士卒曰陽春和氣草木
皆華至於歲寒獨松柏後凋今孤城無援日
益阡危此誠志士盡節揚名之秋若等將若
之何士卒曰不敢惜死人皆殊死戰訥催遂
力戰死之初訥催有一奴強力善射或謂曰
小人而有異材鮮不為害宜遠之訥催不聽

是戰也奴常在訥催左右盡力捍禦遂與同

死王贈訥催職級食

乙酉

唐武德八年新羅真平王四十七年高句麗榮留王八年百濟武王二十六年冬十

一月新羅遣使朝唐因訟高句麗梗路使不
得朝且數見侵掠○高句麗王遣人入唐求

學佛老法帝許之

丙戌

唐武德九年新羅真平王四十八年高句麗榮留王九年百濟武王二十七年秋七

月新羅遣使朝唐帝遣散騎常侍朱子奢來
詔諭新羅百濟與高句麗連和○百濟遣使
如唐獻明光鎧因訟高句麗梗路使不得朝

○高句麗王遣使奉表如唐謝罪請與新羅
百濟二國平○八月百濟攻新羅主在城城
主東所拒戰死之

訂

唐太宗貞觀元年新羅真平王二十四年春
高句麗榮留王十年百濟武王二十八年
三月新羅大風雨土五日○秋七月百濟王
命將軍沙乞侵新羅西鄙拔二城虜男女三
百餘口又欲復新羅所侵地大舉兵出屯熊
津新羅王遣使告急於唐百濟王聞之乃止
○百濟遣福信朝唐帝以羅濟世讎數相侵
伐賜百濟王璽書曰王世為君長撫有東藩

新羅真平王 高句麗榮留王 百濟武王

海隅遐曠風濤難阻忠款之至職貢相尋尚
想嘉猷甚以欣慰朕祗承寵命君臨區宇思
弘正道愛育黎元舟車所通風雨所及期之
遂性咸使乂安新羅王朕之藩臣王之隣國
每聞遣使侵伐不息阻兵安忍殊乖所望朕
已對玉姪福信及高句麗新羅使人具勅通
和咸許輯睦王必須忘彼前怨識朕本懷共
篤隣情即停兵革百濟王因遣使奉表陳謝
外雖順服內實相仇如故○冬十一月新羅
遣使朝唐

唐貞觀二年新羅真平王五十年高句麗秋九月高句麗遣使如唐賀擒突厥頡利可汗仍

上封域圖○新羅饑民賣子而食時劔君為沙梁宮舍人諸舍人盜分倉穀劔君獨不受諸舍人慮其嫌小欲加之劔君笑曰僕編名近郎徒苟非其義雖千金不動心焉近郎龍郎也劔君退詣近郎諸舍人相謂曰不獲此虜言必漏遂召劔君劔君知之辭近郎曰今日之後必不得復見郎問其故劔君不言強之乃言近郎曰胡不自於有司劔君曰畏我

唐貞觀二年高句麗真平王百濟武王

死而抵人罪所不忍也曰然則盍逃乎曰昔由我直而又自逃非丈夫也遂往諸舍人陽謝之置毒於食劔君食之遂死

唐貞觀三年新羅真平王五十年高句麗秋八月新羅王遣伊食任末里波吞冷龍春白龍

蘇判大因舒玄等率兵攻高句麗娘臂城高句麗出兵逆擊之羅軍失利死者甚衆無復闔志時舒玄子度信為中幢幢主語舒玄曰度信平生以忠孝自期臨戰不可不勇蓋聞振領兩裘正提綱而綱張吾其為綱領乎乃

跨馬突陣斬其將提首而來諸軍因乘勝奮
擊斬獲甚多城遂陷舒玄駕洛國王金首露
十一世孫也初舒玄見新羅宗姓肅訖宗之
女萬明悅之不媒而適舒玄為萬弩郡太守
欲與偕往訖宗知之囚萬明別室使人以守
忽震屋門守者驚亂萬明逃出遂與舒玄之
任舒玄嘗於庚辰夜夢熒惑鎮二星降於已
萬明亦於辛丑夜夢有童子衣金甲乘雲入
堂尋有娠二十月而生庾信背有七星文舒
玄謂萬明曰庚辰夜有吉夢得此兒宜以為

名然禮不以日月為名今庚與庾字相似辰
與信聲相近况古人有名庾信遂名之庾信
見麗濟靺鞨侵軼國疆慨然有削平之志獨
入中嶽石窟告天誓曰敵國無道侵擾我封
場略無寧歲一介微臣不量材力志清禍亂
惟天降監假手於我無何一老人來謂曰此
間多毒虫猛獸貴年少來處何也遂授秘訣
曰慎勿妄傳用之不義反受其殃言訖不見
庾信嘗携寶劍入岵薄山其告天誓詞若中
嶽者夜有虛角二星光芒下垂劍若搖動然

辛卯

唐貞觀五年新羅真平王五十二年高句春
麗樂留王十四年百濟武王三十二年
高句麗築長城東北自扶餘城東南至海千
有餘里凡十六年乃畢○夏五月新羅伊
宿與伊宿石品謀叛收宿誅之夷九族
石品亡至百濟後還其家見捕伏誅○秋七
月新羅遣使如唐獻二美女魏徵以為不宜
受上喜曰彼林邑獻鸚鵡猶言苦寒思歸况
二女遠別親戚乎付使者歸之○新羅謫上
舍人實兮于冷林實兮性剛直守正不阿下
舍人玆提便佞為王所嬖與實兮不相能屢

新羅善德女三高句麗樂留王百濟武王

壬辰

讒於王曰實兮無智慧多膽氣急於喜怒雖
大王之言非其意則憤不能已若不懲艾恐
將為亂盍黜之悔謝後用非晚也王然之謫
冷林或謂實兮曰君自先世以忠誠聞今為
佞臣所毀遠謫荒僻之地不亦痛乎何不直
言自辨實兮曰昔屈原孤直而見擯黜李斯
盡忠而被極刑佞臣惑主忠士被斥何足恠
乎遂不言而往作長歌以見意

唐貞觀六年新羅真平王五十四年善德女
主元年高句麗樂留王十五年百濟武王二
十三年春正月新羅王伯淨薨謚真平葬于漢

只唐詔贈左光祿大夫賻物段二百王薨無
嗣國人以長女德曼寬仁明敏立為主初唐
帝賜牧丹花圖并花子真平王以示德曼德
曼曰此花必無香氣王笑曰爾何以知之對
曰此花絕艷而畫無蜂蝶是必無香種其子
果如其言其先識如此

金富軾曰臣聞之古有女媧氏非正是天
子佐伏羲理九州耳至若呂雉武曌值幼
弱之主臨朝稱制史書不得公然稱王但
書高皇后呂氏則天皇后武氏者以天言

新羅善德女王高句麗榮留王百濟武王

之則陽剛而陰柔以人言之則男尊而女
卑豈可許姥嫗出閨房斷國家之政事乎
新羅扶起女子處之王位誠亂世之事國
之不亡幸也書云牝雞之晨易曰羸豕孚
蹢躅其可不為之戒哉

新羅栗里民家薛氏女有艷色父當防秋年
老衰病不堪遠征而薛自以婦人不得代行
居常憤鬱沙梁部人嘉實貪而有志節詣薛
曰願代嚴君之役薛喜告於父父謝嘉實曰
公若不以愚陋見棄願以弱息奉箕箒嘉實

退而請期薛曰婚姻人之大倫不可以猝成
妾既心許有死無貳待君還戍筮日成禮未
晚也乃破鏡中分為信嘉實以一馬屬薛曰
此天下良駿後必有需請善飼之遂行會國
多亂不以時代奄忽六載父謂女曰始以三
年為期期已盡可歸他族薛曰向以親故強
與嘉實成約嘉實代戍邊城辛苦歲月棄信
食言吾不忍為父哀其齒壯無伉儷欲奪情
改婚婚期既定女將逃之見嘉實所留馬太
息流涕嘉實適至形容衣服枯槁藍縷女見

之不識其為嘉實也以破鏡驗之遂為夫婦
○百濟王封元子義慈為太子○冬十月新
羅遣使撫問國內鰥寡孤獨不能自存者賑
恤之

午甲

唐貞觀八年新羅善德女主三年高句春正
麗榮留王十七年百濟武王三十五年
月新羅改元仁平○新羅芬皇寺成○二月
百濟王興寺成寺臨水窮極壯麗創自法王
時至是告成王每親詣行香○三月百濟鑿
池於宮南引水二十餘里注之池中築島嶼
擬海上仙山

未乙

唐貞觀九年新羅善德女王四年高句麗唐遣麗榮留王十八年百濟武王三十六年唐遣使持節冊命新羅女王為柱國樂浪郡公新羅王以襲父封

權近曰天道陽剛而陰柔人道男尊而女卑男正位乎外女正位乎內此天地之常經也人君無後當求宗室之賢以正儲副之位此古今之通義也新羅真平王無子竒愛其女德曼而欲立之及其即位羣臣又不能以大義擇立宗室之賢乃探先君之邪志而立其女其亂常甚矣苟有明天

新羅善德女王高句麗麗榮留王百濟武王

子在上當正其名遣使責讓擇立賢君可也若以遐方難同中國則置之度外亦可也顧以唐太宗之英明不能正名以定陰陽男女之分而乃遣使錫命冊女子為樂浪郡公新羅王夫公與王皆主國君民之稱濫加陰柔之身是則尊卑之辨綱常之重太宗自毀而盡棄之矣未幾遂致武氏僭竊之禍濁亂天常唐之宗支夷滅殆盡是其陰慘之毒實自太宗此舉而啓之矣

新羅靈妙寺成

唐貞觀十年新羅善德女主五年高句春三
麗榮留王十九年百濟武王三十七年月新羅主疾病設百高座於皇龍寺講仁王
 經度僧百人○百濟王率臣僚每遊泗泚河
 北浦四岸巖石錯立間以名花異草王飲酒
 極歡鼓瑟自歌令從者舞之時人稱為大王
 浦○夏五月新羅宮西玉門池蝦蟆大集主
 謂左右曰蝦蟆怒目兵士之相也吾嘗聞西
 南邊谷有名玉門者意有隣兵至其谷乎乃
 命將軍闕川往搜之果百濟將軍于台率甲
 騎五百欲襲獨山城至玉門谷解鞍休士闕

川突至掩擊盡殺之主喜賜絹二百匹○秋
 八月百濟燕羣臣於望海樓

唐貞觀十一年新羅善德女主六年高句春
 麗榮留王二十年百濟武王三十八年春

二月百濟王都地震三月又震○秋七月新

羅以闕川為大將軍○冬十二月百濟遣使

如唐獻金甲雕斧帝優勞之賜錦袍并彩帛

三千段

唐貞觀十二年新羅善德女主七年高句百
 麗榮留王二十一年百濟武王三十九年百

濟王與嬪御泛舟大池○冬十月高句麗侵

新羅北邊七重城百姓驚擾入山谷主命大

監

亥巳

子庚

將軍闕川安集之闕川與高勾麗兵戰於七
重城外克之殺虜甚衆

唐貞觀十三年新羅善德女主八年高勾冬
麗榮留王二十二年百濟武王四十年

十月百濟遣使如唐獻金甲雕芥

唐貞觀十四年新羅善德女主九年高勾春
麗榮留王二十三年百濟武王四十年

正月百濟有星孛于西北○二月高勾麗王

遣世子桓權朝唐帝勞慰賜賚特厚○夏五

月高勾麗新羅百濟並遣子弟如唐請入國

學時帝大徵天下名儒為學官數幸國子監

使之講論學生能明一經已上皆得補官增

築學舍千二百間增學生萬三千二百六十

員於是四方學者雲集京師○秋九月高勾

麗日無光三日

權近曰日者衆陽之宗人君之象也而三

日無光蓋蘇文弒逆之徵已先著矣麗之

君臣當戒謹恐懼防患於未然也惜乎其

不能也

二辛

唐貞觀十五年新羅善德女主十年高勾麗
榮留王三十四年百濟武王四十二年義慈

年王元春三月百濟王璋薨謚曰武太子義慈

立義慈幼有孝友之行時號海東曾子○百

濟遣使入唐告哀帝舉哀玄武門遂詔曰懷遠之道莫先於寵命飭終之義無隔於遐方故柱國帶方郡公百濟王扶餘璋棧山航海遠稟正朔獻琛奉贖克固始終奄致薨殞追深愍悼宜加常數式表哀榮贈光祿大夫賜甚厚遣祠部郎中鄭文表冊命義慈為柱國帶方郡公百濟王秋八月遣使如唐表謝無獻方物○唐嘉高勾麗太子桓權入朝遣職方郎中陳大德報之大德入高勾麗所至城邑以綾綺厚餉官守者曰吾雅好山水如

有勝處欲觀之守者喜導大德遊歷殆遍悉得山川道里險易見隋末華人從軍陷沒者為道親戚故舊存亡人人感泣及至都王盛陳兵衛迎之及大德還悉陳高勾麗虛實且奏曰高勾麗聞高昌亡大懼館侯之勤加於常數帝悅曰高勾麗本四郡之地吾發卒數萬攻遼東彼必傾國救之別遣舟師出東萊自海道趨平壤水陸合勢取之不難但山東州縣凋瘵未復吾不欲勞之耳

寅壬

唐貞觀十六年新羅善德女主十一年高勾麗榮留王二十五年寶藏王元年百濟義慈

年王二高句麗王命東部大人蓋蘇文築長城
權近曰自古弑逆之賊必欲其衆人之附
已也蓋蘇文既為東部大人又因築城招
集徒衆以行誅賞蓋欲其附已者衆也惜
乎麗之君臣不能察之於微以制於未亂
也

百濟遣使朝唐○秋七月百濟王親帥兵侵
新羅取國西獼猴等四十餘城八月又與高
句麗謀欲取新羅党項城以絕歸唐之路新
羅主遣使告急於唐○百濟將軍允忠陷新

羅大耶城都督金品釋降幢下舍知竹竹死
之初品釋悅慕容黔日妻奪之黔日恨之至
是百濟來攻黔日內應燒其倉庫城中洶懼
品釋之佐西川登城謂允忠曰將軍若不殺
我願以城降允忠許之西川遂勸品釋及諸
將士出城降幢下竹竹止之曰百濟反覆之
國不可信也而允忠言甘必誘我也若出城
必為所殺與其鼠伏而求生不若虎鬪而死
品釋不聽開門先出土率百濟發伏盡殺之
品釋聞將士死先殺妻子而自刎竹竹收殘

率閉城門自拒舍知龍石謂竹竹曰今兵勢如此必不得全不善生降以圖後效竹竹曰吾父名我以竹竹者使我歲寒不彫可折而不可屈豈可畏死而生降乎遂力戰城陷與龍石同死允忠生獲一千餘人分居國西州縣留兵守城新羅主贈竹竹級煇龍石大柰麻移其妻子於王都厚賜之○冬十月高勾麗蓋蘇文弑其君建武立王姪臧蓋蘇文一名蓋金姓泉氏自云生水中以感衆狀貌雄偉意氣鷙悍其父東部大人對盧死蘇文

新羅善德女 主高勾麗寶藏王百濟義慈

當嗣而國人惡猜暴不之立蘇文謝衆請攝如有不可雖廢無悔衆哀之遂嗣父而凶殘尤甚諸大人與王密議欲誅事洩蘇文悉集部兵若將校閱者盛陳酒饌於城南台諸大人臨視至皆殺之凡百餘人遂入宮弑王斷為數段棄之溝中立臧或云寶藏為王自為莫離支莫離支官名如唐兵部尚書燕中書令也於是專擅國事莫敢誰何常身佩五刀左右莫敢仰視每騎馬必令貴人武將伏地履而上下之出入以兵自隨前導者至則人皆奔

送不避坑谷○十一月唐聞高勾麗王計舉
哀於苑中詔贈物三百段遣使持節吊祭○
新羅遣伊飡金春秋乞師於高勾麗初大耶
之敗品釋之妻金氏亦死金氏即春秋之女
春秋聞之倚柱而立終日不瞬既而言曰嗟
乎大丈夫不能滅讎國乎乃詣主曰臣願奉
使高勾麗請兵報怨百濟主許之將行謂庾
信曰春秋與君為王股肱休戚同之若我往
不返君何以處之庾信曰若然僕之馬跡必
交踐於麗濟兩王之庭不然將何面目見國

人乎春秋遂與庾信誓曰以愚料之六旬當
還過此無再見之理行至代買縣縣人且斯
支贈青布三百步既入麗境麗王遣太女對
盧蓋金館之燕慰有加或告麗王曰新羅使
者非庸人殆欲觀我形勢其早圖之俾無後
患王亦素聞春秋名嚴兵威而後見之春秋
曰今百濟無道長蛇封豕侵軼我疆場寡君
願仗大國之威一雪之使下臣致命於下執
事王謂曰麻峴竹嶺本我國地地若還兵可
出春秋曰臣奉君命來乞師大王無意救患

而劫行人以歸地臣有死而已王怒囚之春秋以其青布賂王寵臣先道解道解語春秋曰子亦嘗聞龜兔之說乎昔東海龍女病心醫言得兔肝則可療也然海中無兔龍王患之有一龜曰吾能得之遂登陸見兔言海中有一島清川白石茂林佳果寒暑不能到鷹隼不能侵爾若得至可以安居無患因負兔游行二三里顧謂兔曰今龍女病須兔肝為藥故不憚勞負汝來耳兔曰噫吾神明之後能出五載洗而納之日者小覺心煩遂出肝

洗之暫置巖石之底聞爾甘言徑來肝尚在彼若歸取肝汝得所求吾雖無肝尚活豈不兩相宜哉龜信之乃還纔上岸兔脫入草中謂龜曰愚哉汝也豈有無肝而生者乎龜憫默而去春秋聞之喻其意移書於王曰二嶺本大國地分臣得歸國所不請寡君還地者有如繳日春秋既六旬不返度信請王將伐高句麗募兵三千語曰吾聞見危致命臨難忘身夫一人致死當百人百人致死當千人千人致死當萬人則可以橫行天下今隣國

無道國相見繫志士仁人腐心之秋也遂請
王以行庾信已渡漢江高勾麗謀者奔告王
既見春秋書又聞謀者之言遂厚禮春秋而
歸之春秋出境謂送者曰國家疆理非使臣
所得專向與大王書云云者圖遣死耳新羅
主喜拜庾信押梁州軍主

唐貞觀十七年新羅善德女王十二年春高
高勾麗寶藏王二年百濟義慈王三年

勾麗王追尊其父大陽為王○高勾麗遣使
于唐求道教先是蓋蘇文告王曰三教譬如
鼎足闕一不可今儒釋並興而道教未盛請

遣使於唐求之王奉表陳請帝遣道士叔達
等八人兼賜老子道德經王喜館於佛寺○
夏閏六月唐遣使冊高勾麗王滅為上柱國
遼東郡公高勾麗王帝嘗謂羣臣曰蓋蘇文
弑其君而專國政誠不可忍以今日兵力取
之不難但不欲勞百姓吾欲使契丹鞣鞣擾
之何如長孫無忌曰蘇文自知罪大畏大國
之討嚴設守備陛下姑為之隱忍彼得以自
安必更驕情愈肆其惡然後討之未晚也帝
曰善遣使持節備禮冊命詔曰懷遠之規前

王令典繼世之義制代舊章高句麗王滅器
懷昭敏識字詳正早習禮教德義有聞肇承
藩業誠款先著宜加爵命允茲故實○秋九
月新羅遣使如唐乞師曰臣國累遭百濟攻
襲今百濟復與高句麗連兵將大舉來伐社
稷必不獲全謹遣陪臣歸命大國願乞偏師
以存救援帝謂使人曰我實哀爾為二國所
侵所以頻遣使人和爾三國高句麗百濟旋
踵翻悔意必吞滅而分爾土宇爾國設何奇
謀以免顛越使人曰吾王事窮計盡唯告急

大國以翼全之帝曰我少發邊兵惣契丹靺
鞨直入遼東二國自解可緩爾一年之圍此
後若兩國知無繼兵還肆侵侮於爾未安此
為一策我給爾朱袍丹幟數千二國兵至建
而陳之彼見者以為我師來援必皆奔走此
為二策百濟恃海之險不修兵械男女紛雜
互相燕聚我以數十百舡載以甲卒銜枚泛
海直襲其地可以取之然爾國以婦人為主
為隣國輕侮靡歲休寧我遣一宗支與為爾
主而不可獨王當遣兵營護待爾國安住爾

自守此為三策爾宜思之將從何策使人不能對帝謂使人庸鄙非乞師告急之才也○冬十一月百濟與高句麗和親謀欲取新羅党項城以塞入朝之路遂發兵攻之聞新羅主遣使請救於唐乃還

唐貞觀十八年新羅善德女王十三年春正高句麗寶藏王三年百濟義慈王四年

月新羅遣使朝唐○高句麗蓋蘇文曰唐使先是帝命司農丞相里玄獎賜高句麗王璽書曰新羅乘質國家朝貢不之爾與百濟各宜戢兵若更攻之明年發兵擊爾國矣玄獎

入境蓋蘇文已將兵擊新羅破其兩城王使召之乃還玄獎諭以旨蓋蘇文曰我與新羅釁成已久往者隋兵伐我新羅乘隙奪我地五百里城邑皆有之自非歸我侵地兵恐未能已玄獎曰既往之事焉可追論今遼東諸城本皆中國郡縣中國尚且置之高句麗豈得必求故地蓋蘇文竟不從玄獎還具言其狀帝曰蓋蘇文弑其君賊其大臣殘虐其民今又違我詔命不可不討又遣蔣儼諭旨蓋蘇文竟不奉詔以兵脅使者不屈遂囚之窟

室中○百濟遣使朝唐○百濟王立子隆為太子大赦○秋九月新羅遣金庾信領兵伐百濟取加兮省熱同火等七城因開加兮津○高句麗蓋蘇文貢白金於唐褚遂良曰蓋蘇文弑其君九夷所不容今將討之而納其金此郤鼎之類也臣謂不可受帝從之使者又言蓋蘇文遣官五十八宿衛帝怒謂使者曰汝曹皆事高武有官爵蓋蘇文弑逆汝曹不能復讎今更為之遊說以欺大國罪孰大焉悉以屬大理○冬十一月帝自將伐高句

麗先是帝欲親征羣臣皆勸帝毋行帝曰吾知之矣去本以趨末捨高以取下釋近而之遠三者為不祥伐高句麗是也然蓋蘇文弑君又戮大臣一國之人延頸待救議者顧未亮耳於是北翰粟營州東儲粟古大人城至是帝至洛陽前宜州刺史鄭天璠已致仕帝以其嘗從隋場伐高句麗名詣行在問之對曰遼東道遠糧轉艱阻東夷善守城不可猝下帝曰今日非隋之比公但聽之以刑部尚書張亮為平壤道行軍大總管帥江淮嶺

兵四萬長安洛陽募士三千戰艦五百艘自東萊州泛海趣平壤又以太子詹事左衛率李世勣為遼東道行軍大總管帥步騎六萬及蘭河二州降胡趣遼東兩軍合勢大集於幽州遣行軍總管江行本少監丘行淹先督衆士造梯衝於安羅山時遠近勇士應募及獻攻城器械者不可勝數帝皆親加換益取其便宜又手詔諭天下以蓋蘇文弑主虐民情何可忍今欲巡幸幽薊問罪遼碣所過營頓無為勞費且言隋煬殘暴其下麗王仁愛

新羅善德女王高句麗寶藏王百濟義慈王

其民以思亂之軍擊安和之衆故不能成功今略言必勝之道有五一曰以大擊小二曰以順討逆三曰以理乘亂四曰以逸敵勞五曰以悅當怨何憂不克布告元元勿為疑懼於是凡頓舍供備之具減者大半詔諸軍及新羅百濟奚契丹分道擊之

唐貞觀十九年新羅善德女王十四年春正高句麗寶藏王四年百濟義慈王五年春正

月新羅遣使朝唐○百濟侵新羅不克金庾信自伐百濟還未見主封人急報百濟大軍來攻買利浦城主又拜度信為上州將軍令

巳乙

拒之度信聞命不見妻子而行逆擊百濟軍走之斬首二千獻捷未及歸家又急報百濟兵出屯國界將大舉來侵主謂度信曰國之存亡繫公一身不可不煩公再往度信遂行衆曰大將軍尚如此况我輩乎百濟軍望之不敢迫乃退○二月帝至定州謂侍臣曰遼東本中國之地隋氏四出師而不能得朕今東征欲為中國報子弟之讎高勾麗雪君父之恥耳且方隅大定唯此未平故及朕之未老用士大夫餘力以取之帝發定州親佩弓

矢手結雨衣於鞍後李世勣軍葺柳城多張形勢若出懷遠鎮者而潛師北趣甬道出高勾麗不意夏四月世勣自通定濟遼水至玄菟高勾麗城邑大駭皆閉門自守副大總管江夏王道宗將兵數千至新城折衝都尉曹三良引十餘騎直壓城門城中驚懼無敢出者營州都督張儉將胡兵為前鋒進渡遼水趨建安城破高勾麗兵數千人世勣道宗攻蓋牟城拔之獲一萬人糧十萬石以其地為蓋州張亮率舟師自東萊渡海襲卑沙城城

四面懸絕唯西門可上程名振引兵夜至副
摠管王大度先登夏五月城陷男女八千口
沒焉○羅新主聞帝親征發兵三萬以助之
百濟乘虛襲取新羅國西七城新羅主遣金
庾信侵百濟○帝攻高句麗遼東白巖等城
拔之先是李世勣進至遼東城下帝至遼澤
泥淖二百餘里人馬不可通將作大匠閻立
德布土作橋軍不留行渡澤東高句麗王發
新城國內城步騎四萬救遼東道宗將四千
騎逆之軍中皆以為衆寡懸絕不若深溝高

壘以待車駕之至道宗曰賊恃衆有輕我心
遠來疲頓擊之必敗當清路以待乘輿乃更
以賊遺君父乎都尉馬文舉曰不遇勅敵何
以顯壯士策馬奔擊所向皆靡衆心稍安既
合戰行軍摠管張君乂退走唐兵敗劔道宗
收散卒登高而望見麗軍陣亂與驍騎數十
衝之世勣引兵助之麗軍大敗死者千餘人
帝渡遼水撤橋以堅士卒之心軍於馬首山
下勞賜道宗超拜文舉中郎將斬君乂帝自
將數百騎至遼東城下見士卒負土填塹帝

分其尤重者於馬上持之從官爭負土置城下世勳攻遼東城晝夜不息旬有三日帝引精兵會之圍其城數百里鼓噪聲振天地世勳列砲車飛大石過三百步所當輒潰麗人積木為樓結絙網不能拒以衝車撞陴屋碎之時百濟上金鬃鎧又以玄金為文鎧士被以從甲光炫日南風急帝遣銳卒登衝竿之夫藝其西南樓火延燒城中因揮將士登城麗軍力戰不克死者萬餘人見虜勝兵萬餘人男女四萬口糧五十萬石以其城為遼州

世勳進攻白巖城西南帝臨其西北城主孫代音潛遣腹心請降臨城投刀鉞為信代音願降而城中有不從者帝以幟與其使曰必降者宜立之城上代音立幟城中人以為唐兵已登城皆從之白巖城請降既而中悔帝怒其反覆令軍中曰得城當悉以人物賞戰士世勳見帝將受其降帥甲士數十人請曰士卒所以爭冒矢石不顧其死者貪虜獲耳今城垂拔奈何更受其降孤戰士之心帝下馬謝曰將軍言是也然縱兵殺人而虜其妻

擊朕所不忍世勣乃退得城中男女萬餘口
臨水設帳受其降以白巖城為巖州以代音
為刺史初蓋蘇文遣加尸城七百人戍蓋牟
城世勣盡虜之其人請從軍自效帝白汝家
皆在加尸汝為我戰蓋蘇文必殺汝妻子得
一人之力而滅一家吾不忍也皆廩賜遣之
以蓋牟城為蓋州○帝攻高勾麗安市城高
勾麗將北部耨薩高延壽南部耨薩高惠真
帥師救之兵敗降先是帝至安市城進兵攻
之延壽惠真帥其軍及靺鞨兵十五萬救安

市帝謂侍臣曰今為延壽策有三引兵直前
連安市城為壘據高山之險食城中之粟縱
靺鞨掠吾牛馬攻之不可猝下欲歸則泥濘
為阻坐困吾軍上策也拔城中之衆與之宵
遯中策也不度智能來與吾戰下策也卿曹
觀之彼必出下策成擒在吾目中矣時對盧
高正義年老習事謂延壽曰秦王內芟羣雄
外服夷狄獨立為帝此命世之才今據海內
之衆而來不可敵也為吾計者莫若頓兵不
戰曠日持久分遣騎兵斷其糧道糧食既盡

求戰不得欲歸無路乃可勝延壽不從引軍直進去安市城四十里帝恐其低徊不至命大將軍阿史那杜余將突厥千騎以誘之兵始交而偽走延壽曰易與耳競進乘之至安市城東南八里依山而陣帝悉召諸將問計長孫無忌對曰臣聞臨敵將戰必先觀士卒之心臣適行經諸營見士卒聞麗兵至皆拔劍結旆喜形於色此必勝之兵也陛下未冠身親行陣凡出奇制勝皆上稟聖謨諸將奉聖筭耳今日之事乞陛下指蹤帝笑曰諸公

以此見讓朕當為諸公商度乃與無忌等從數百騎乘高望之觀山川形勢可以伏兵及出入之所高勾麗軍與靺鞨合兵為陣長四十里帝望之有懼色道宗曰高勾麗傾國以抗王師平壤之守必弱願假臣精兵五千覆其本根則數十萬之衆可不戰而降帝不應遣使給延壽曰我以爾國強臣弑其主故來問罪至於交戰非吾本心入爾境芻粟不給故取爾數城俟爾國修臣禮則所失必復矣延壽信之不復設備帝夜召文武計事命世

勳將步騎萬五千陣於西嶺無忌進達將精
兵萬一千為奇兵自山北出於狹谷以衝其
後帝自將步騎四千挾鼓角偃旗幟登山帝
勅諸軍聞鼓角齊出奮擊因令有司張受降
幕於朝堂之側是夜流星墜延壽營旦日延
壽等獨見世勳軍小勅兵欲戰帝望見無忌
軍塵起命作鼓角舉旗幟諸軍鼓噪並進延
壽等懼欲分兵禦之而其陣已亂會有雷電
龍門人薛仁貴著奇服大呼陷陣所向無敵
高勾麗軍披靡大軍乘之高勾麗軍大潰死

者二萬餘人帝望見仁貴拜遊擊將軍延壽
等將餘衆依山自固帝命諸軍圍之無忌悉
撤橋梁斷其歸路延壽惠真帥其衆三萬六
千八百人請降入軍門拜伏請命帝簡擄薩
已下官長三千五百人遷之內地餘皆縱之
使還平壤收靺鞨三千三百人悉坑之獲馬
五萬匹牛五萬頭明光鎧萬領它器械稱是
更名所幸山曰駐蹕山刻石紀功焉以延壽
為鴻臚卿惠真為司農卿驛書報太子曰朕
為將如此何如初新羅人薛處頭嘗與親友

言其志曰國家用人論骨品苟非其族雖有
鴻材傑功不能自振我願西遊中華奮不世
之略立非常之功自致榮路簪紳劔佩出入
天子之側足矣隨海舶入唐及是戰自薦為
左武衛果毅深入疾鬪而死功一等帝問是
何許人左右以實對帝恻然曰中國人尚畏
死顧望不前而外國人為吾死事何以報其
功乎脫御衣覆之贈大將軍以禮葬之○帝
攻安市城不克班師帝之克白巖也謂李世
勣曰吾聞安市城險而兵精其城主材勇蓋

蘇文之亂城守不服蓋蘇文擊之不能下因
而與之建安兵弱而糧少若出其不意攻之
必克公可先攻建安建安下則安市在吾腹
中此兵法所謂城有所不攻者也對曰建安
在南安市在北吾軍糧皆在遼東今踰安市
而攻建安若麗人斷吾糧道將若之何不如
先攻安市安市下則鼓行而取建安耳帝曰
以公為將安得不用公策勿誤吾事世勣遂
攻安市安市人望見帝旗蓋輒棄城鼓噪帝
怒世勣請克城之日男子皆坑之安市人聞

之益堅守攻久不下延壽惠真請於帝曰奴既委身大國不敢不獻其誠欲天子早成大功奴得與妻子相見安市人顧惜其家人自為戰未易猝拔今奴以高句麗十餘萬衆望旗沮潰國人膽破烏骨城耨薩老耄不能堅守移兵臨之朝至夕克其餘當道小城必望風奔潰然後收其資糧鼓行而前平壤必不守矣羣臣亦言張亮兵在沙城名之信宿可至乘高句麗洵懼併力拔烏骨城渡鴨綠水直取平壤在此舉矣帝將從之獨無忌以為

天子親征異於諸將不可乘危徼幸今建安新城之虜衆猶十萬若向烏骨皆躡吾後不如先破安市取建安然後長驅而進此萬全之策也帝乃止諸將急攻安市帝聞城中鷄鳴聲謂世勣曰圍城積以城中煙火日徹今鷄鳴甚喧此必饗士欲夜出襲我宜嚴兵備之是夜高句麗軍數百人縋城而下帝聞之自至城下召兵急擊之麗軍死者數十人餘軍退走道宗督衆築土山於城東南隅侵逼其城城中亦增高其城以拒之士率分番交

戰日六七合衝車礮石壞其樓堞城中隨立木柵以塞其缺道宗傷足帝親為之針築山晝夜不息凡六旬用功五十萬山頂去城數丈下臨城中道宗使果毅傅伏愛將兵屯山頂以備敵山頽壓城城崩會伏愛私離所部麗軍數百人從城缺出戰遂奪據土山塹而守之帝怒斬伏愛以徇命諸將攻之三日不能克道宗徒跣詣旗下請罪帝曰汝罪當死但朕以漢武殺王恢不如秦穆用孟明且有破蓋牟遼東之功故特赦汝耳帝以遼左早

寒草枯水凍士馬難久留且糧食將盡勅班師先拔遼蓋二州戶口渡遼乃耀兵於安市城下而旋城中皆屏跡不出城主登城拜辭帝嘉其固守賜縑百疋以勵事君命世勳道宗將步騎四萬為殿至遼東渡遼水遼澤泥潦車馬不通命無忌將萬人翦草填道水深處以車為梁帝自繫薪於馬鞘以助役冬十月帝至瀟溝駐馬督填道諸軍渡渤錯水暴風雪士卒沾濕多死者勅燃火於道以待之凡拔玄菟橫山蓋牟磨末遼東白巖早沙麥

谷銀山後黃十城徙遼蓋巖三州戶口入中國者七萬人延壽自降後常憤歎尋以憂死惠真竟至長安新城建安駐蹕三大戰屢軍及唐兵馬死者甚衆帝以不能成功深悔之嘆曰魏徵若在不使我有是行也

金富軾曰唐太宗聖明不世出之君除難比於湯武致理幾於成康至於用兵之際出奇無窮所向無敵而東征之役敗於安市則其城主可謂豪傑非常者矣而史失其姓名與揚子胥云齊魯大臣史失其名

無異甚可惜也

臣等按唐祿山之亂張巡守睢陽以疲卒數萬嬰孤城拒方張不制之虜扼其項鯁其喉牽掣首尾使不得噬食東南江淮得全賊既平資其財用以濟中興其有功於唐室者大矣安市城主以孤城弱卒嚴兵固守抗大唐堂堂數萬之師帝雖親臨督戰竟不能拔諸軍不得東向爭平壤遼以東卒獲安全城主之有功於高句麗亦不細矣蓋巡雖不能制寇繫羣寇於一城凡

大小數百戰力屈而死其忠義凜凜至今
如一日城主不屈於蘇文其節可尚今又
嬰城固守民不血刃及帝之還登城拜辭
帝亦嘉之賜繡帛以勵事君之節其忠義
又豈下於巡也哉且巡之所敵者皆梁宋
間羣盜卒不能守城而死城主所抗者乘
輿又能守城而全節謂之豪傑非常之才
不亦宜乎

冬十一月新羅以伊食毗曇為上大等

唐貞觀二十年新羅善德女王十五年春二
高句麗寶藏王五年百濟義慈王六年

丙午

月帝還京師謂李靖曰吾以天下之衆困於
高麗何也靖曰此道宗所解帝顧問道宗具
陳在駐蹕時乘虛取平壤之策帝愴然曰當
時恣恣吾不省也○夏五月高句麗遣使謝
罪并獻二美女帝還之謂使者曰色者人所
重然憫其去親戚朕不取也○高句麗東明
王毋塑像泣血三日○初帝將還以弓服賜
蓋蘇文受之不謝而又益驕恣雖遣使奉表
其言率皆詭誕又待唐使者倨傲常窺伺邊
隙帝雖屢勅勿攻新羅而侵凌不止帝詔勿

許朝貢更議討之

東鑑卷六

四十五

東國通鑑卷之六

東國通鑑卷之七

三國紀

新羅

高勾麗

百濟

未丁

唐貞觀二十一年新羅善德女主十六年真德女主元年高勾麗寶藏王六年百濟義慈王七年
 春正月新羅誅毗曇廉宗等初毗曇等謂女主不能善理舉兵欲廢之屯明活城官軍屯月城攻守十日不解夜有大星落月城毗曇等謂士卒曰吾聞落星之下必有流血此殆女主敗衄之兆士卒呼吼聲振天地主聞之恐懼失次度信見主曰吉凶無常惟人

東鑑卷七

所召故紂以赤雀亡魯以獲麟表高宗以雉
雉興鄭公以龍鬪昌故知德勝於妖則星辰
變異不足畏也請主勿憂乃造偶人抱火載
於風鳶而颺之若上天然翌日使人傳言於
路曰昨夜落星還上使賊軍疑焉又刑白馬
祭於落星之地呪曰天道則陽剛而陰柔人
道則君尊而臣卑苟或易之即為大亂今毗
曇等以臣而謀君自下而犯上此所謂亂臣
賊子人神所同嫉天地所不容今天若無意
於此而反見星恠於主城此臣所疑惑而不

喻者也惟天之威從人之欲善善惡惡無作
神著於是督諸將卒奮擊之毗曇等敗伏誅
連坐者三十人○新羅作瞻星臺累石為之
上方下圓通其中人由中而上高數丈○新
羅主德曼薨謚曰善德葬于狼山主平日預
言死期至其日果薨世稱主知幾三事蓋謂
見畫花知無香聞蛙知兵預言死期爾於是
真平王母弟國飯之女勝曼立長七尺垂手
過膝○二月新羅以伊飡闕川為上大等大
阿飡守勝為牛頭州郡主○唐遣使追贈新

羅善德主為光祿大夫仍策命主為柱國封樂浪郡王○帝將復伐高句麗朝議以謂高句麗依山為城不可猝拔向者大駕親征其民不得耕種所克之城實收其穀繼以旱災民大半乏食今若數遣偏師侵軼疆場使彼疲於奔命釋耒入堡數年之間千里蕭條則人心自離鴨綠之北可不戰而取矣帝從之以左武衛大將軍牛進達為青丘道行軍大摠管右武衛將軍李海岸副之發兵萬餘人乘樓船自萊州泛海而入又以太子詹事李

世勳為遼東道行軍大摠管右武衛將軍孫貳朗等副之將兵三千人因營州都督府兵自新城道入兩軍皆選習水善戰者配之世勳軍既渡遼歷南蘇等數城皆背城拒戰世勳擊敗之焚其羅郭而還秋七月進達海岸入高句麗境凡百餘戰攻石城拔之進至積利城下麗兵萬餘人出戰海岸擊克之麗軍死者三千人帝勅宋州刺史王波利等發江南十二州工人造大船數百艘欲以伐高句麗○新羅遣使如唐謝恩○新羅改元太和

○冬十月百濟侵新羅敗績新羅丕寧子死之時百濟將軍義直率步騎三千進攻茂山甘勿洞岑三城羅主遣金庚信率步騎一萬拒之百濟兵甚銳庚信苦戰力竭顧謂丕寧子曰歲寒然後知松柏之後彫今日事急矣非子誰能奮勵出奇以激衆心乎丕寧子曰今於稠人之中獨屬我可謂知己當以死報之出語其奴合節曰今日當上為國家下為知己死之子舉真幼有壯志必欲與我俱死若父子併命家人疇依若與舉真好收吾骨

歸慰母心即橫槊突陣格殺數人而死舉真欲赴闕同死合節執鞚止之曰大人有遺命負父命棄母慈可謂孝乎舉真曰見父之死偷生苟存亦豈得為孝乎劒合節臂突陣亦死合節曰旣天崩矣不死何為亦交鋒而死三軍感激齊進所向摧陷斬三千餘級義直僅以身免庚信撫三屍哭甚痛主哀之以禮葬之恩賞甚渥○十二月高句麗王使第二子莫離支任武如唐謝罪

申戊

唐貞觀二十二年春正月高句麗王使第二子莫離支任武如唐謝罪

月新羅遣使朝唐○高勾麗遣使朝唐○帝
詔右武衛大將軍薛萬徹為青丘道行軍大
摠管右衛將軍襄行方副之將兵三萬餘人
及樓船戰艦自萊州泛海擊高勾麗○三月
百濟將軍義直侵新羅西鄙陷腰車等十餘
城夏四月進至玉門谷新羅主患之命押梁
州都督金庾信禦之庾信分軍三道夾擊之
百濟兵敗走庾信追北殺之幾盡三悅賞士
率有差○唐烏胡鎮將古神感將兵浮海來
擊高勾麗遇高勾麗步騎五千戰於易山破

之高勾麗兵萬餘人夜襲神感船伏殺又破
之○帝謂高勾麗困弊議以明年發三十萬
衆一舉滅之或以謂大軍東征須備經歲之
糧非畜乘所能載宜具舟艦以輸糧餉隋末
劔南獨無寇盜屬者遼東之役又不預其百
姓富庶宜使之造舟艦帝從之○秋七月遣
左領左右府長史強偉於劔南道伐木造舟
艦大者或長百尺其廣半之別遣使行水道
自巫峽抵江陽趣萊州○唐薛萬徹等渡海
入鴨綠至泊灼城南四十里止營城主所夫

孫帥步騎萬餘拒之萬徹遣右衛將軍裴行方領步卒及諸軍乘之麗兵潰行方等進兵圍之泊灼城因山設險阻鴨綠水以為固攻之不拔麗將高文率烏骨安地諸城兵三萬餘人來援分置兩陣萬徹分軍以當之麗軍潰帝又詔萊州刺史李道裕轉糧及器械貯於烏胡島將欲大舉○冬新羅使邯帙許如唐帝勅御史問新羅臣事大朝何以別稱年號帙許對曰天朝不嘗頒正朔自先祖法興王私有紀年若大朝有命小國又何敢焉帝

然之○新羅主遣金庾信伐百濟初庾信在梁州數月飲酒作樂若無意於軍旅者州人謗曰師衆久安有餘力可以一戰而將軍之玩愒何耶庾信知民可用告主伐百濟以報大耶之役主曰以小觸大危將奈何對曰兵之勝否不在大小顧人心何如耳故紂有億兆人離心離德不如周家十亂同心同德今吾衆一心可與同死生百濟不足畏也主許之遂進兵大耶城外百濟兵逆戰庾信佯北至玉門谷百濟輕之大率衆來追伏發掩擊

前後大敗之獲裨將八人斬級一千庾信使
告百濟將軍曰我軍主品釋及妻金氏之骨
埋於爾國獄中今爾裨將八人為我所擒匍
匐請命我哀首丘之意未忍加害今送死易
生者何如百濟佐平仲常言於王曰死骨留
之無益若新羅失信則曲在彼乃以品釋夫
妻之骨櫛還之庾信許八人還遂乘勝入百
濟之境攻拔獄城等十二城斬首二萬餘級
生獲九千人又屠進禮等九城斬首九千餘
級虜六百人主論功增庾信秩伊嶺上州行

軍大摠管○新羅主遣伊嶺金春秋及其子
文汪如唐帝遣光祿卿柳亨郊勞之既至見
春秋儀表英偉厚待之春秋請詣國學觀釋
奠及講論帝許之仍賜御製溫湯及晉祠二
碑文并新撰晉書又召燕見賜以金帛特厚
問曰卿有夙懷乎春秋奏曰弊國僻在海隅
服事天朝積有歲年而百濟強猾屢肆侵凌
往年大舉深入攻陷數十城以塞朝覲之路
陛下不借天威翦除凶逆則弊邑梯航述職
無復望矣帝深然之又問聞爾國有金庾信

者其為人何如對曰庾信雖小有才智若不
藉天威豈能除隣患帝曰誠君子之國也乃
勅將軍蘇定方帥師二十萬征百濟春秋又
請改章服以從華制於是內出珎服賜春秋
及其從者詔授春秋為特進文汪為左武衛
將軍將還詔令三品以上餞之優禮甚備春
秋奏曰臣有七子願留一子以備宿衛乃留
文汪而還春秋至海上遇高句麗邏兵從者
溫君解高冠大衣坐於船上邏兵以為春秋
殺之春秋乘小船得免至嘉君解贈大阿飡

優賞其子孫春秋見庾信曰死生有命故得
生還復與公相見庾信曰庾信仗國威靈再
與百濟戰拔城二十斬獲三萬餘又使品釋
夫妻之骨得返鄉里此亦天幸

唐貞觀二十三年高句麗寶藏王八年百濟真德王三年春正月新羅始依華制為冠服○夏四月帝崩遺詔罷遼東之役

金富軾曰初太宗有事於遼東也諫者非
一又自安市旋軍之後自以不能成功深
悔之歎曰若使魏徵在不使我有此行也

及其將復伐也司空房玄齡上表諫以為
老子曰知足不辱知止不殆陛下威名功
德既云足矣拓地開疆亦可止矣且陛下
每決一重囚必令三覆五奏進素膳止膏
樂者重人命也今無罪之士率委之鋒
刃之下使肝腦塗地獨不足憫乎嚮使高
句麗遠失臣節誅之可也侵擾百姓滅之
可也他日能為中國患除之可也今無此
三條而坐煩中國內為前代雪恥外為新
羅報讎豈非所存者小所損者大乎願陛
下許高句麗自新焚凌波之船罷應募之
衆自然華夷慶賴遠肅邇安梁公將死之
言諄諄若此而帝不從思欲丘墟東域而
自快死而後已史論曰好大喜功勤兵於
遠者非此之謂乎柳公權小說曰駐蹕之
役高句麗與靺鞨合軍方四十里太宗望
之有懼色又曰六軍為高句麗所乘殆將
不振候者告英公之麾黑旗被圍帝大恐
雖終於自脫而危懼如此而新舊書及司
馬公通鑑不言者豈非為國諱之者乎

秋八月百濟遣左將殷相帥精兵七千攻陷
新羅石吐等七城命大將軍金庾信及竹旨
陳春天存等出拒分三軍為五道擊之互相
勝負經旬轉鬪僵屍滿野遂進屯道蔭城下
歇馬餉士時有水鳥東飛過庾信募將士以
為不祥庾信曰此不足恠也今日必有百濟
人來謀汝等佯不知又使徇于軍中曰堅壁
不動待明日後軍至然後決戰謀者聞之歸
報殷相殷相等謂有加兵疑懼於是庾信等
奮擊大克虜將軍正仲斬殷相及將士十人

軍卒八千九百八十人獲馬萬匹器械不可
勝記佐平正福與其後降庾信皆綴之凱旋
主迎勞優厚

戊庚

唐高宗永徽元年新羅真德女王十四年夏六月

月新羅主遣金法敏如唐告破百濟主又自
製大平頌織錦為紋以獻其辭曰大唐開洪
業龜龜皇猷曷止戈戎衣定修文繼百王統
天崇兩施利物體舍章深仁諧日用蕪運邁
時康幡旗何赫赫鉦鼓何鏗鏘外夷違命者
剪覆被天殃淳風疑幽顯遐邇競呈祥四時

和玉燭七曜延萬方維嶽降宰輔維帝任忠
良五三成一德昭我唐家皇帝嘉之拜法敏
為大府卿以還○新羅始行唐永徽年號
金富軾曰三代改正朔後代稱年號皆所
以一大統新百姓之視聽者也是故苟非
乘時並起兩立而爭天下與夫英雄乘間
而作亂精神舉則不可私行年號若新羅
以一意事中國使航貢篚相望於道而法
興自稱年號感矣厥後承愆襲繆歷年已
久太宗之謂讓猶且因循至是然後奉行

唐彌雖出於不得已而抑可謂過能改者矣

辛

唐永徽二年新羅真德女王十五年高句麗王正
曆寶藏五十年百濟義慈王十一年
月朔新羅主御朝元殿受百官朝賀賀正之
禮始於此○二月新羅改稟主為執事部仍
以波珍食竹旨為執事中侍以掌機密○新
羅遣波珍冷金仁問如唐仍留宿衛仁問春
秋第二子也幼而就學博覽羣書燕涉莊老
浮屠之說工隸書善射御曉音律識量宏遠
至是帝謂涉海來朝忠誠可尚特授左領軍

衛將軍年二十三○百濟遣使朝唐使還帝
降璽書諭主曰海東三國閉塞日久並列疆
界地實犬牙近代以來遂構嫌隙戰爭交起
略無寧歲遂令三韓之氓命懸刀俎尋戈肆
憤朝夕相仍朕代天理物載深矜憫去歲高
句麗新羅等使並來入朝朕命釋茲讎怨更
敦款睦新羅使金法敏奏言高句麗百濟唇
齒相依競舉干戈侵逼交至大城重鎮並為
百濟所并疆宇日蹙威力並謝乞詔百濟令
歸所侵之城若不奉詔即自興兵打取但得

古地即請交和朕以其言既順不可不許昔
齊桓列土諸侯尚存亡國况朕萬乘之主豈
可不恤危藩王所蕪新羅之城並宜還其本
國新羅所獲百濟俘虜亦遣還王然後解患
釋紛韜戈偃革百姓獲息肩之願三蕃無戰
爭之勞比夫流血邊庭積屍疆場耕織並廢
士女無聊豈可同年而語哉王若不從進止
朕已依法敏所請任其餘王決戰亦令約束
高句麗不許遠相救恤高句麗若不承命即
令契丹諸藩度遼深入抄掠王可深思朕言

自求多福審圖良策無貽後悔

唐高祖五年新羅真德王十三年百濟義慈王十四年太宗王十四年春三月新羅主勝曼薨謚曰真德葬沙梁

部羣臣請伊飡闕川攝政闕川固讓曰老夫

無德可稱今之德望莫若金春秋羣臣遂奉

為王春秋三讓而後即位春秋真智王之孫

○唐聞新羅主薨為舉哀於永光門使太常

丞張文收持節吊祭贈開府儀同三司賜綵

段三百匹○夏四月新羅王追尊考為文興

大王妣為文貞太后大赦○高句麗有神見

於馬嶺山謂人曰汝國君臣奢侈無度亡無

日矣○五月新羅命理方府令良首等參酌

律令定為理方府格六十餘條○唐遣使持

節備禮冊命新羅主為開府儀同三司新羅

王詔書至有難解處有牛頭者能解之王驚

喜問其姓名對曰臣本任那加良人牛頭也

王曰見卿頭骨可稱強首使製謝表文工而

意盡王益奇之稱佷坐不名強首不治生產

家甚貧王命有司歲賜新城租一百石○新

羅遣使奉表如唐謝恩○冬十月高句麗王

卯乙

遣將安固與靺鞨兵擊契丹松漠都督李窟哥
哥集之大敗高勾麗軍於新城

唐末徵王十四年百濟義慈王十二年高勾麗春高

勾麗與百濟靺鞨連兵侵軼新羅北境取三十三城王遣使求援於唐○二月百濟修太子宮極侈麗立望海亭於王宮南○三月唐遣營州都督程名振左右衛中郎將蘇定方發兵擊高勾麗○新羅王立元子法敏為太子麻子文汪為伊食老旦為海殄仁泰為角食知鏡愷元並為伊食○夏五月程名振等

渡遼水高勾麗人見其兵少開門渡貴湍水逆戰名振等奮擊大克之殺獲千餘人焚其外郭及村落而歸○秋七月百濟修馬川城○九月新羅金庾信攻百濟刃比州城克之是時百濟君臣奢淫不恤國事民怨神怒災恠屢見庾信告王曰百濟無道罪浮桀紂此誠順天吊伐之秋也先是級飡租未坤為夫山縣令被虜於百濟為佐平任子家奴從事勤恪無怠容任子縱其出入未坤逃歸庾信知其可用謂曰吾聞任子專百濟思與之圖

事而難其人子盍往語之未坤曰公不以不
肖而使之雖死無悔還百濟從容語任子曰
前日畏罪不敢直言實往新羅而還度信令
達下意於執事曰兩國存亡未可先知若彼
亡子依於我此亡我依於子任子嘿然問數
月任子謂未坤曰已悉若前言可歸報度信
未坤遂還言百濟事甚悉於是并吞之謀愈
急○新羅金歆運與百濟戰死之王憤麗濟
侵軼謀伐之遂出師以歆運為郎幢大監歆
運行屯百濟陽山下欲攻助川城百濟人乘
夜來襲黎明緣壘而入羅軍驚駭不定百濟
兵因亂急擊飛矢雨集歆運橫馬握槊待之
大舍詮知曰今賊起暗中咫尺不辨雖死無
知者况公王之寵壻國之貴骨若死賊手敵
之所幸我之所恥歆運曰大丈夫既以身許
國何計人之知不知而易心乎強立不動從
者控馬勸避歆運以劒揮之遂突陣格殺數
人而死於是太監穢破少監狹得亦皆戰死
步騎幢主寶用那聞歆運死曰彼骨貴勢榮
猶不愛死如予者生而無益死亦何損乎又

東鑑七
十五
赴敵死王傷淖贈歆運穢破一吉飡寶用那
款得大奈麻時人作陽山歌以傷之歆運奈
勿王八世孫少遊花郎文努之門徒衆有言
及戰死留名者歆運為之慨然流涕有激勵
思齊之志同門僧轉密曰此人若赴敵必不
還也有驟徒者嘗為僧至是語其徒曰吾聞
佛者上則精術業以復性次則起道用以益
也我形桑門無一善可取不如從軍殺身以
報國乃著戎服改名驟徒詣兵部請從軍及
戰突陣力闔亦死之

權近曰季路問子行三軍則誰與孔子曰
暴虎馮河死而無悔者吾不與也必也臨
事而懼好謀而成者乎是雖因子路之才
而告之然實行師之要道也不量其衆寡
不察其虛實不審其形勢而輕死於賊手
則何益於事哉殺吾身而可以克敵則死
之可也生吾身而祇以辱國則死之可也
無是二者則豈可輕吾身而快賊之心乎
歆運不聽詮知之說輕死於敵手豈非烈
於志而短於謀乎勝敗者兵家之常事也

與其死而無救於敗孰若不死而圖効於後日哉然視畏死而偷生者則有間矣

臣等

嘗三國鼎峙之時新羅為國兵衆

不如麗濟土地不如麗濟形勢不如麗濟
卒之二國先滅而新羅獨存何耶其人心
世道之淳厖有以致之也大抵新羅之俗
尚忠信崇節義臨戰則以進死為榮退生
為辱此其所以可稱者非麗濟二國所能
及也子朱子嘗論秦俗曰雍州土厚水深
其民厚重質直無鄭衛驕惰浮靡之習故

尚氣槩先勇力忘生輕死其強毅果敢之
資足以成富強之業非山東諸國所可及
也新羅之淳風厚俗其亦類是歟然而雍
州之地文武用之以興二南之化使新羅
如有躬行心得之君作而唱之則變魯至
道之機其不在於此乎惜乎新羅之治止
於新羅而已耶

新羅王以女嫁大角食金庾信

丙反

唐顯慶元年新羅太宗王三年高句麗春三
月百濟王殺諫臣佐平成忠先是王率宮人

淫醜耽樂成忠極諫王怒囚之由是無敢言者成忠不食臨死上書曰忠臣死不忘君願一言而死臣嘗觀時察變必有兵革之事凡用兵必審擇地勢處上流以應敵可以保全敵兵若來使陸不過炭峴水不入白江據險隘禦之然後可也王不省遂死獄中

權近曰自古以來從諫改過者未有不興而拒諫自是者未有不亡也義慈之於成忠不唯諫而不聽敢繫獄而殺之以快其心其致身俾而國滅非不幸也率至敵兵

之水陸超者已踰於炭峴馬江而後悔不用其言亦何及哉

夏五月高句麗王都兩鐵○新羅金仁問自

善歸○秋七月新羅遣子女汪朝唐

唐顯慶二年新羅太宗王四年高句麗春正月百濟王拜庶子四十一人為佐平各賜食

邑○夏四月百濟大旱

唐顯慶三年新羅大宗王五年高句麗春三月新羅王以何瑟羅地連鞞鞞人不能安罷

京為州置都督以鎮之又以悉直為北鎮○

午戊 巳丁

未巳

夏六月唐營州都督兼東夷都護程名振右
領軍中郎將薛仁貴將兵攻高句麗不克
唐顯慶四年新羅太宗王六年高句麗
寶曆王十八年百濟義慈王十九年春二
月百濟有象狐入王宮一狐坐上佐平書案
○百濟遣將侵新羅獨山桐岑二城○新羅
將伐百濟遣使如唐乞師○百濟宮中槐樹
鳴聲如人哭夜鬼哭於宮南路○冬十月新
羅王欲伐百濟請兵於唐不報嘗獨坐憂形
於色若有長春罷郎者曰臣雖枯骨猶懷報
國之心大唐皇帝已命大將軍蘇定方等領

兵將以明年五月伐百濟今大王勤行至此
故敢先告之既而不見王異之厚賞長春罷
郎兩家子孫又創漢山州壯義寺以資冥福
長春罷郎嘗死於百濟之戰者也○十一月
唐右領軍中郎將薛仁貴等與高句麗將温
沙門戰於橫山破之

唐顯慶五年新羅太宗王七年高句麗
寶曆王十九年百濟義慈王二十年春正

月新羅以伊飡金庾信為上大等○二月百
濟王都井水赤如血西海濱羣魚死百姓食
不能盡泗沘河水赤如血○三月唐遣左武

衛大將軍蘇定方等伐百濟初新羅因宿衛
金仁問乞師至是帝決意討之徵仁問問道
路險易仁問應對甚悉帝悅遂以定方為神
丘道行軍大總管仁問為副大總管帥左驍
衛將軍劉伯英龐孝公右武衛將軍馮士貴
等水陸十三萬伐百濟勅新羅王為崑夷道
行軍總管為之聲援○夏六月新羅王將兵
助唐伐百濟次南川停王聞蘇定方等引兵
自萊州濟海舳艫千里軍于德物島遣太子
法敏大將軍金庾信將軍真珠天存等領兵

船一百艘會定方定方謂法敏曰定方由浚
太子從陸期以七月十日與大王兵會直擣
義慈都城可以得志矣法敏曰寡母之望大
軍久聞命必蓐食至定方喜遣法敏歸法敏
未言定方軍勢甚盛王喜又遣法敏庾信品
日欽春等率精兵五萬應之進次今突城是
時百濟多怪蝦蟆數萬集於樹上都市人相
驚走若有捕逐者僵仆死者百計亡失財物
無筭又震天王道讓二寺塔及白石寺講堂
又有玄雲如龍闔空中有犬如野鹿至細此

河岸向王宮吠王都羣犬聚於路或哭或吠
有鬼入王宮中大呼百濟亡百濟亡即入地
王使人掘之深可三尺許得一龜背有文曰
百濟同月輪新羅如月新王問之巫解曰同
月輪者滿也滿則虧如月新者未滿也未滿
則漸盈王怒殺之或曰同月輪者盛也如月
新者微也意者國家盛而新羅寢微乎王喜
至是始懼會羣臣問戰守之宜佐平義直曰
唐兵不習水艦遠涉溟海因其憊擊之可以
得志羅人恃大國之援有輕我心若唐兵失

新羅太宗王高句麗寶藏王百濟義慈王

利則必疑沮不敢銳進臣故知先與唐兵決
戰可也這率常永曰唐兵遠來意欲速戰其
鋒不可當羅人嘗屢敗於我今望我兵勢不
得不懼莫若塞唐兵之路以老其師先遣偏
師擊羅軍挫其銳氣然後伺便擊唐兵則可
以全軍矣王猶豫不決佐平與首嘗得罪竄
水王遣人問曰事惡矣如之何與首曰唐兵
既衆師律嚴明况與新羅為犄角若對陣於
原野勝敗未可知白江炭峴國之要衝一夫
單營萬人莫當宜簡勇士往守使唐兵不得

入白江羅人不得過炭峴大王重閉固守待
其糧盡卒疲然後奮擊破之必矣議者皆曰
與者久在縲紲怨君而不愛國其言不可用
莫若使唐兵入白江沿流而下不得方舟羅
軍升炭峴由徑而行不得並馬即縱兵擊之
譬如在籠之鷄羅網之魚蔑不獲矣王深然
之○秋七月高句麗平壤河水血色三日○
新羅將軍金庾信等擊破百濟兵將軍階伯
死之庾信等進軍黃山原百濟聞唐羅兵已
過白江炭峴遣將軍階伯率死士五千拒之

階伯曰以一國偏師當二國之兵存亡未可
知恐必為妻子累與其生辱不如死快遂盡
沒家屬至黃山先據險設營猝遇羅兵階伯
誓衆曰背勾踐以五千人破強吳七十萬衆
今日諸君宜各奮勵以報國恩人皆鏖戰無
不一當千庾信分軍為三道四戰不利士卒
力竭將軍欽春謂子盤屈曰為臣當盡忠為
子當盡孝見危致命忠孝兩全盤屈入陣力
戰死之左將軍品日之子曰官昌善騎射時
為副將品日語諸將曰吾見年纔十六志氣

頗勇今日是立功名之時也官昌介馬單槍徑赴敵陣殺數人為敵所擒生致階伯階伯愛其少且勇不忍殺嘆曰新羅固多奇士不可輕也少年尚如此况壯士乎乃縱還之官昌語其父曰今入敵中不能斬將可恨也再突障力戰階伯又擒斬之以其首送品日品日曰吾兒面目如生能死於王事幸矣三軍感激皆有死志進擊百濟軍大破之階伯死之虜佐平忠常常永等二十餘人新羅王贈盤屈官昌級食以禮葬之

新羅王高句麗寶藏王百濟義慈王

權近曰階伯受命為將董軍將殺先殺其妻子其不道甚矣雖有心死國難之心而無力戰克敵之計是先喪其士氣而取敗之事也將苟得人則以少擊衆以弱制強者兵家之常也吳將周瑜能以五萬擊曹魏之六十萬晉將謝玄亦以五萬破苻秦之八十萬百濟之兵豈下於五萬而唐羅之衆豈過於六十萬哉然任瑜以誠者孫權也舉玄不疑者謝安也是吳晉之君相有人而任將得人也今百濟則主昏於上

臣佞於下賢者見逐而不肖者在位矣其能將得其人乎階伯之狂悖殘忍如此是不戰而自屈者矣但獲官昌不殺而還之及其兵敗不降而死之有古名將之遺風矣又按品日命子官昌獨入敵陣亦非不知徒死而已敢為之不辭者新羅之法戰死之人皆厚葬而爵賞之賚及一族國人稱重而慕效以死為榮有古戰國之風矣然官昌一入敵陣幸而生還留與衆兵俱進則雖出入擊刺而欲殺身成名亦不必

新羅太宗王高句麗寶藏王百濟義慈王

至於死矣乃使未冠之童單騎再往是欲其子之必死而忍之也不可以訓後世矣

臣等按為將者受命則忘其家臨軍約誓則忘其親援抱鼓之則忘其身有死之志無生之計幸而勝則國家之福不幸而敗則執節以死是時百濟之君昏虐滋甚天怒民怨亡徵屢見唐羅夾攻雖騃兒愚婦皆知其必亡階伯為將自分必死恐妻累見污皆先殺之及兵敗不屈死之其殺妻子雖或過中未可以此而深訾之權近論

階伯一則曰不道二則曰狂悖殘忍何哉
若以喪士氣取敗為罪也則論人者當論
其志節而已成敗利鈍非所計也昔宋末
朱崖之變陸秀夫劉鼎孫皆先沈家屬于
海繼之以死其忠義凜凜至今皎如白日
階伯知國必亡不愛其身况愛其妻累乎
不愛其妻累况背君父乎百濟之亡無一
忠臣義士徇國捐生者獨階伯執節不二
此古人所謂國亡與亡者也君子愛人以
德如階伯者豈以小失而輕其大節乎是

不可不辨

唐兵與新羅兵圍百濟都城拔之百濟王義
慈降唐兵執之以歸時蘇定方金仁問等濟
師于伎伐浦百濟合兵熊津口禦之定方出
左涯乘高而陣與之戰百濟軍大敗庾信至
唐營定方以後期將斬庾信督軍金文穎庾
信揚言曰大將軍不見黃山之役以後期為
罪吾不能無罪而受辱必先與唐兵決戰然
後破百濟乃杖鉞軍門怒髮如豎腰間寶劍
自躍出鞘定方右將董寶亮躡足言曰新羅

兵將有變定方乃釋文頴將步騎直趨都城百濟悉衆拒之死者又萬計唐兵乘勝薄城百濟主知不免嘆曰悔不用成忠之言以至於此王子隆移書唐將乞退兵未幾唐羅軍圍都城四道齊進隆又使上佐平致犒定方却之王與太子孝率左右夜遁保熊津城王宮諸姬走大王浦崑石上墮死後人名其崑為落花次子泰自立為王率衆固守太子之子文思謂隆曰王與太子固在而叔自王唐兵雖解我輩安得全遂率左右總城而出民

新羅太宗王

高句麗寶藏王

百濟義慈王

皆從之隆與大佐平千福等出降定方令兵士攀堞立唐旗幟泰窘開門請命於是義慈率太子孝自熊津城來詣定方降定方謂度信曰吾受命便宜從事今欲以所得百濟之地分公等為食邑度信曰大將軍以天兵來伐不道雪小國之讎寡君與一國臣民方喜抃之不暇敢私受自利乎新羅王自今突城至遣弟監天福露布告捷於唐八月置酒宴定方及將士坐義慈堂下使行酒百濟羣臣莫不嗚咽流涕九月定方以義慈及子孝泰

隆演大臣將士八十八人百姓萬二千八百七人渡海還仁問與沙飡儒敦大奈麻中知等隨定方如唐仍宿衛

右百濟

自始祖温祚王以前漢成帝鴻

嘉三年癸卯都慰禮城國號十濟後改百濟乙卯移都漢山近仇首王辛未移都北漢山文周王乙卯移都熊津聖王戊午移都泗泚國號南扶餘至義慈王庚申唐高宗顯慶五年而亡合三十三共六百七十八年

金富軾曰新羅古事云天降金穰故姓金氏其言可恠而不可信臣修史以其傳之舊不得刪落其辭然而聞新羅人自以少昊金天氏之後故姓金氏高句麗亦以高辛氏之後姓高氏古史曰百濟與高句麗同出扶餘又云秦漢亂離之時中國人多竄海東則三國祖先豈其古聖人之苗裔耶何其享國之長也至於百濟之季所行多非道又世仇新羅與高句麗連和以侵軼之因利乘便割取新羅重城巨鎮不已

非所謂親仁善隣國之實也於是唐天子
弄下詔平其怨陽從而陰遠之以獲罪於
大國其亡也宜矣

臣等按始祖乃以東明之胤為太子既忌
懼不見容逃難奔寬間關崎嶇至河南建
邦設都雖萬事草創而尚能嚴兵固守禦
樂浪靺鞨吞馬韓而滅之又能抗高句麗
敵新羅成鼎足之勢以基七百年之業非
豪傑之主能然乎**多婁**作稻田賑窮民優
禮大臣有人君之度然構釁新羅爭一小

新羅太宗王高句麗寶曆王

城數十年之間兵革不息**巴婁**修好新羅
得交隣之義**蓋婁**雖史稱恭順納叛臣而
失鄰和誣小民而亂其妻何足道哉**背古**
仇首歷年雖長無事可稱**古企**喜遊畋未
免禽荒之失然賑貧之復租調定官制錮
賊吏交鄰修好是足多者**青稻汾西**以十
乘之尊不自慎重或死於敵兵或殞於賊
手悲夫**比流**又在民間知民疾苦作其即
位賑窮調乏史稱寬慈愛人庶矣而四十
一年之間災變屢見飢饉荐至民不聊生

何哉**契王**在位纔二年但比流代汾西而立其終也傳汾西之子契王契王代比流而立其終也傳比流之子近肖古尚有遜讓之風**近肖古**與高句麗失和至殺其主挑怨速禍世為讎敵兩國之間于戈爛熳而不已**近仇首**在位十年粗保其國**初**始信佛法迎胡僧創寺度僧欲以邀福踰年而薨佛不足信明矣**辰期**喜土木甘遊畋侈宮室池沼以畜珍奇玩物喪志田於狗原或旬或月卒死行宮惜哉**阿莘**窮兵

新羅太宗王 高句麗寶藏王

黷武殆無虛歲民困兵革多奔敵國輕質國本於島夷樂不得嗣**腆文**又質於外王薨國有內難返而得國何其幸也**又**傳之**毗有傳之****蓋鹵**蓋鹵驕奢昏闇請上國欲伐強鄰信敵間親昵戲玩大興功役惟宮室臺榭是崇是飾至於烝土築城緣河樹堰伐石作檝人力盡悴倉廩告匱尚不知墮於敵國之術國勢魚爛而敵兵淹至噬臍無及身死人手尚誰咎哉傳曰國必自伐而後人伐之蓋鹵之謂矣**又周**

嗣緒正卧薪嘗膽之秋而優柔不斷受制
強臣身且不保**三斤**以童稚之年能命將
討賊復君父之讎快神人之憤是可稱也
而享年不永惜哉**東城**當國凶歉民飢不
救起臨流閣極其壯麗遊宴自恣閉宮門
拒諫臣荒于遊畋久而不返為賊臣所害
武寧誅苟加得討賊之義然失子民之道
不能勞來安集為敵國驅民前史稱仁慈
寬厚何耶**聖王**初立能斷大事國人稱聖
逮至末年與新羅謀伐高勾麗不得其志

新羅太宗王 高勾麗寶藏王

背舊好發忿兵遂死鋒鏑真所謂一朝之
忿亡其身者也**威德**雖無德政享國悠久
惠王即位二年而薨**法王**繼緒崇信佛教
禁屠殺放鷹鷄焚漁獵之具創寺度僧蓋
欲延祚也而踰年乃薨多見其惑也**武王**
恃強驕驕侵掠新羅殆無寧歲干戈迭侵
流屍蔽野唐皇詔諭戢兵外雖陳謝而內
實不然晚年穿宮南池起望海樓遊泗泚
河盤樂怠傲惟日不足國之不亡幸矣**義**
慈之為太子也事親以孝與兄弟以友及

其即位慮囚原罪其為政粗足可觀但其
闇於大體無深謀遠略不知新羅唇齒之
勢妄興干戈謀欲吞噬今年奪一城明年
奪一城席累勝之威驕氣遽溢視新羅為
囊中之物欲取之心囂然未已違帝詔無
釋紛之心結高麗絕朝貢之路猶且淫酗
耽樂杜絕忠諫天怒於上屢出災異丁寧
譴告而猶不省悟晏然自肆不能保炭峴
白江之險唐兵一至而社稷丘墟扶餘氏
不祀忽諸嗚呼悲哉

新羅太宗王高句麗寶藏王

唐分百濟故地置熊津馬韓東明金漣德安
五都督府各統州縣擢渠長為都督刺史縣
令以理之命郎將劉仁願以兵一萬留鎮泗
泚城百濟餘兵入泗泚謀掠生降者仁願與
新羅人擊走之濟兵退上泗泚南嶺豎柵屯
聚伺隙抄掠百濟遺衆反應者二十餘城帝
遣左衛中郎將王文度為熊津都督撫其餘
衆至三年山城暴卒○冬十月新羅王班師
王率太子及諸軍攻尔禮城取之置官守百
濟二十餘城震懼皆降又攻泗泚南嶺軍柵

斬首一千五百級行渡鷄灘攻王興寺岑城
七日乃克斬首七百人○十一月高勾麗攻
新羅七重城軍主匹夫死之初新羅王以麗
濟鞞鞞相為唇齒同謀侵奪求忠勇材堪綏
禦者以匹夫為七重城下縣令至是高勾麗
忌新羅滅百濟舉兵來圍其城匹夫且守且
戰者二旬士卒皆殊死戰麗將以謂不可猝
拔欲引還大奈忘比軟密以城內食盡告敵
麗將復戰匹夫宗知之乃斬比軟首投之城
外令軍士曰忠臣義士死且不屈勉我城之

新羅太宗王高勾麗王

存亡在此一戰奮拳一呼病者皆起爭先赴
敵然士卒飢乏不可復振麗兵乘風縱火攻
之愈急匹夫與一二將士力戰矢集其身如
蝟血流至踵乃死王哭甚哀贈級飡○新羅
王至自伐百濟論功以屬衿卒宣服為級飡
軍師豆迭為高干贈戰死者官有差初置大
角干以大將軍金庾信為之在十七位之上
百濟降人並量才任用佐平忠常常永達率
自簡授一吉飡恩率武守仁守授大奈麻○
蘇定方以義慈等見帝責而宥之帝慰藉定

方且曰何不因而伐新羅定方曰新羅其君
仁而愛民其臣忠以事國下之事上如父兄
國雖小不可謀也初唐人滅百濟營於泗水
丘謀侵新羅王召羣臣問計有獻策者曰今
我卒詐為百濟服為賊者唐人必擊之因與
之戰可以得志庚信請從之王曰唐人為我
滅敵而反與之戰天其佑我耶庚信曰夫雖
畏其主踏其脚則友噬之豈可遇難而不救
自底於亡乎唐人知新羅有備乃還○義慈
病死帝贈金紫光祿大夫衛尉卿許舊臣赴

新羅太宗王 高勾麗寶藏王

臨詔葬孫皓陳叔寶墓側并豎碑授子隆司
稼卿○唐以左驍衛大將軍契苾何力為領
江道左武衛大將軍蘇定方為遼東道左驍
衛將軍劉伯英為平壤道並為行軍大總管
蒲州刺史程名振為鏤方道總管將兵分道
伐高勾麗



